



ამბროლაურის მუნიციპალიტეტის საკრებულოს

გ ა ნ კ ა რ გ უ ლ ე ბ ა N77

2024 წლის 20 დეკემბერი
ქ. ამბროლაური

ამბროლაურის მუნიციპალიტეტის საჯარო სკოლის მოსწავლეთა საზაფხულო ბანაკის პროგრამის დამტკიცების შესახებ

საქართველოს ორგანული კანონის „ადგილობრივი თვითმმართველობის კოდექსი“-ს მე-16 მუხლის მე-3 პუნქტის, 61-ე მუხლის მე-2 პუნქტისა და საქართველოს ზოგადი ადმინისტრაციული კოდექსის 61-ე მუხლის პირველი პუნქტის შესაბამისად ამბროლაურის მუნიციპალიტეტის საკრებულომ

გ ა დ ა წ ყ ვ ი ტ ა :

1. დამტკიცდეს „ამბროლაურის მუნიციპალიტეტის საჯარო სკოლის მოსწავლეთა საზაფხულო ბანაკის პროგრამა“ დანართის შესაბამისად.
2. ძალადაკარგულად გამოცხადდეს „ამბროლაურის მუნიციპალიტეტის საჯარო სკოლის მოსწავლეთა საზაფხულო ბანაკის პროგრამის დამტკიცების შესახებ“ ამბროლაურის მუნიციპალიტეტის საკრებულოს 2023 წლის 19 დეკემბრის N80 განკარგულება.
3. განკარგულება შეიძლება გასაჩივრდეს ძალაში შესვლიდან ერთი თვის ვადაში, ამბროლაურის რაიონულ სასამართლოში (მისამართი: ქ. ამბროლაური, კოსტავას ქ. N13).
4. განკარგულება ძალაში შევიდეს 2025 წლის 01 იანვრიდან.

საკრებულოს თავმჯდომარე:



ასლან საგანელიძე

ამბროლაურის მუნიციპალიტეტის საჯარო სკოლის მოსწავლეთა საზაფხულო ბანაკის პროგრამა

მუხლი 1. პროგრამის აღწერა და აქტუალობის დასაბუთება

ამბროლაურის მუნიციპალიტეტში მცხოვრებ სოციალურად დაუცველ ახალგაზრდებს (საჯარო სკოლების მოსწავლეებს) მეტ-ნაკლებად შეზღუდული აქვთ შესაძლებლობა დაისვენონ აქტიურად, მონაწილეობა მიიღონ ახალგაზრდულ პროექტებსა თუ საგანმანათლებლო აქტივობებში, რომელიც დაეხმარება მათ სხვადასხვა უნარების განვითარებაში, საზოგადოებაში ინტეგრაციასა და სამოქალაქო თვითშეგნების ამაღლებაში, ასევე ჯანსაღი ცხოვრების წესის დამკვიდრებაში. სოციალურად დაუცველ ახალგაზრდებს, ხშირ შემთხვევაში, ფინანსური პრობლემების გამო, საშუალება არ აქვთ შეიცვალონ საცხოვრებელი გარემო, დაისვენონ ახალგაზრდულ ბანაკებში.

მუხლი 2. პროგრამის მიზანი

პროგრამის მიზანია ახალგაზრდების:

ა) მოტივირება-წახალისება და საზოგადოებრივ ცხოვრებაში მეტად ჩართულობის უზრუნველყოფა;

ბ) საკუთარი ნიჭის, შესაძლებლობების გამოვლენის და გაძლიერების ხელშეწყობა;

გ) სწორი შეხედულებების ჩამოყალიბება სხვადასხვა საკითხთან დაკავშირებით;

დ) სამოქალაქო საზოგადოების ღირსეულ წევრებად ჩამოყალიბების ხელშეწყობა.

მუხლი 3 .პროგრამის ბენეფიციარები

1. პროგრამის ბენეფიციარია:

ა) ახალგაზრდა, რომელმაც 2024–2025 სასწავლო წელს დაამთავრა მუნიციპალიტეტის ტერიტორიაზე არსებული საჯარო სკოლის მეთერთმეტე კლასი და მისი ოჯახის სარეიტინგო ქულა სოციალურად დაუცველი ოჯახების მონაცემთა ერთიან ბაზაში არ აღემატება 150 001-ს (ბენეფიციართა შერჩევისას ყურადღება გამახვილდება აკადემიურ მოსწრებასა და სოციალურად დაუცველთა სარეიტინგო ქულაზე);

ბ) ახალგაზრდა, რომელმაც გაიმარჯვა ქვეყნის მასშტაბით ორგანიზებულ სხვადასხვა შინაარსის ღონისძიებაში;

2. ახალგაზრდული ბანაკის ხანგრძლივობაა არაუმეტეს 10 (ათი) დღე.

მუხლი 4 . წარმოსადგენი დოკუმენტაცია

დაინტერესებულმა პირმა, ამბროლაურის მუნიციპალიტეტის მერიას უნდა წარუდგინოს შემდეგი დოკუმენტაცია:

ა) განცხადება ამბროლაურის მუნიციპალიტეტის მერის სახელზე;

ბ) პირადობის დამადასტურებელი ან/და დაბადების მოწმობის ასლი;

გ) ცნობა ჯანმრთელობის მდგომარეობის შესახებ;

დ) ინფორმაცია მუნიციპალური საგანმანათლებლო რესურსცენტრიდან მოსწავლის მიერ საჯარო სკოლის მეთერთმეტე კლასის მიმდინარე სასწავლო წელს დაამთავრების და აკადემიური მოსწრების შესახებ (მხოლოდ, სოციალურად დაუცველი ახალგაზრდის შემთხვევაში);

ე) ამონაწერი სსიპ „სოციალური მომსახურების სააგენტოს“ რაჭა-ლეჩხუმი-ქვემო სვანეთის სოციალური მომსახურების სამხარეო ცენტრიდან დაინტერესებული პირის ოჯახის სარეიტინგო ქულის შესახებ (მხოლოდ, სოციალურად დაუცველი ახალგაზრდის შემთხვევაში);

ვ) დოკუმენტი, რომლითაც დასტურდება ქვეყნის მასშტაბით ორგანიზებულ ღონისძიებაში გამარჯვება (მხოლოდ, ღონისძიების გამარჯვებული ახალგაზრდის შემთხვევაში).

მუხლი 5. პროგრამის ფინანსური უზრუნველყოფა

პროგრამის ფინანსური უზრუნველყოფა ხორციელდება ამბროლაურის მუნიციპალიტეტის ბიუჯეტიდან.

მუხლი 6. პროგრამის ადმინისტრირება

პროგრამის ადმინისტრირებას ახორციელებს ამბროლაურის მუნიციპალიტეტის მერიის პირველადი სტრუქტურული ერთეული - განათლების, კულტურის, ძეგლთა დაცვის, სპორტისა და ახალგაზრდობის საქმეთა სამსახური. სამსახურის პასუხისმგებლობა (წარმოდგენილი მასალების შესაბამისად) პროგრამის ბენეფიციარები შეარჩიოს მიუკერძოებლად.

მუხლი 7. პროგრამის მოსალოდნელი შედეგი

პროგრამის განხორციელებით მუნიციპალიტეტში მცხოვრებ ახალგაზრდებს (საჯარო სკოლის მოსწავლეებს) საშუალება მიეცემათ გაიძლიერონ სხვადასხვა კომპეტენციები, გამოავლინონ და განავითარონ საკუთარი შემოქმედებითი, კულტურული და სპორტული უნარები. გაიზრდება მათი საზოგადოებრივ ცხოვრებაში ინტეგრაციის ხარისხი.

მუხლი 8. პროგრამის განხორციელების ვადები

პროგრამის მოქმედების ვადა განისაზღვრება 2025 წლის 01 იანვრიდან 31 დეკემბრის ჩათვლით.

მუხლი 9. დასკვნითი დებულება

პროგრამაში ცვლილებების ინიცირება შეუძლია, ამბროლაურის მუნიციპალიტეტის მერს დამოუკიდებლად ან ამბროლაურის მუნიციპალიტეტის მერიის პირველადი სტრუქტურული ერთეულის - განათლების, კულტურის, ძეგლთა დაცვის, სპორტისა და ახალგაზრდობის საქმეთა სამსახურის ხელმძღვანელის მიმართვის საფუძველზე.